

Declarasaun Politik Bancada Democratico.

Dili, sesta feira (02/10/2020) Prezidente Bancada Democratico Dr. [António Da Conceição](#), atual Secretariu Geral Partido Democratico hato'o Declarasaun politik Bancada Democratico iha debate Generalidade Orsamentu Jeral do Estado (OJE) 2020 iha sala Plenaria Parlamento Nasional.

Exia Sr. Presidente do PN
Exia Sr. Primeiro Ministro
Exmos Membros do Governo
Distintas e distintos deputadas e deputados
Povo Timor-Leste

"Kaer metin Ukun Rasik An Hari Nasaun Husiosi Baze".

Desizaun politika nebe orgaun soberanu ida nee hola mak sei reproduz ka hamosu konsekuensia ba lalaok politika tomak Timor-Leste nian.

Ohin Governu ho Parlamentu tabik malu fila fali iha Parlamentu Nacional hodi koalia kona ba desenvolvimento nacional Timor-Leste nian liu hosi instrumentu politiku Orsamentu Geral do Estado. Orsamentu 2020 mak orsamentu ida nebe Deputadus balun iha Uma Lisan povu nian ida nee rejeita iha dia 17 de janeiro 2020 iha debate generalidade. Rejeisaun OGE 2020 laos acto politiku isoladu ida ka actu mesak ida maibe actu politiku ida nebe ninia kauza mai ho situasaun politikas lubun.

VIII Governu nebe iha inisiu forma hosi AMP representadu hosi CNRT, PLP no KHUNTU la consegue lori Uma kain AMP nian iha moris hamutuk iha ukun AMP nian. Maioria AMP nebe hetan tiha ona viabilizasaun hosi partidu PD, PUDD, UDT/FM hahu kedas iha 2018 iha debate OGE 2018 to 2019 no mos iha debate ba aprovasaun Proposta compra acoes no aprovasaun tratadau Mar de Timor molok celebra tinan 20 Referendum Timor-Leste iha Maio 2019 la foti oportunidade ida nee hodi konsolida kasamentu partidu tolu ne nian atu hametin ukun AMP nian.

Isolamentu politiku ba líder partidu CNRT no nia kuadrus importantes iha estrutura VIII GOVERNU hamihis (enfraqe) fiar malu koligasaun AMP nian rasik;

Politika trava malu lori mos efeitus multiplikativus lubun iha Parlamento Nacional nebe AMP trava tomak visita Presidente da Republika ba estrangeiro atu halao knar chefe estado nian.

Situasaun sira nebe ami temi, faktus balun deit hodi hatudu ba ita hotu nia reflexão katak Osan nebe la passa iha parlamento laos deit tanba kapasidade Governu nian atu halo planu, kasipade governu nian atu executa orsamentu maibe hafalun mos ho situasaun sira nebe ami temi.

Ohin ita hahú hikas debate ba OGE 2020 nebe deputados sira rejeita iha 17 de janeiro liu ba nebe fo tiha ona implikasaun hodi atraza tan tiha ona ita nia desenvolvimento nacional iha periudu impasse politika naruk.

Debate OGE nafatin ho VIII Governu maibe ho nia kompozisaun politika foun Governu Viabilizadu no viabilizasaun hosi Partidu FRETILIN nudar sócio foun iha ukun VIII Governu nian.

Biar Governu ne Viabilizadu, OGE2020 intrumentu politiku ida nebe importante tebes atu hatur hikas normalidade, atu halibur ita hotu hodi hola desizaun ba interesse nacional.

Ita nia povu maioria sei moris hela iha susar laran. Asesu ba facilidades publikas hanesan Edukasaun, Saude, be mos, sanitasaun sei kurang. Kurang laos tanba laiha, maibe kurang

tanba facilidades nebe iha barak mak kondisaun at ona tanba halo iha tempu nebe kleur ona no balun mos herda hosi potencia ocupante na altura.

Ekonomia Timor-Leste mos ladun diak. Ekonomia Timor-Leste nian ita bele dehan economia importada tanba investimento iha sector produtivos hanesan agricultura, turismu, peskas hetan atensaun kiik. Karik ida ne insusesu ida hosi ukun sira nebe PD mos participa hodi viabiliza politika hakotu krize politikas nebe afeta ita nia nasaun hahu kedas iha tinan 2002 mai to 2007, PD hola responsabilidade ba ida nee. MAibe PD mos husu honestidade partidu seluk no líder sira nebe mos oras ne ukun atu rekoinhece katak situasaun nebe ita hasoru hahu hosi 2002 sae mai la hanesan ona ho ambiente nebe oras ne ita iha. Los duni ita iha situasaun afetada tanba pandemia nebe influensia tebes ita nia prosesu desenvolvimento, maibe ita tenki honestu katak krize ida nee hahu kedas ona iha tinan 2017 bainhira partidu balun hamrik ho pozisaun nebe lafiar na hodi habadak tiha VII Governu nia ukun. Ne mak realidade nebe ita iha hodi hamosu impasse naruk ida to agora.

Deklarasaun hotu nebe kondena Governasaun CNRT ho nia aliadus sira iha passadu nebe dehan gasta osan bihao 12 no laiha resultat, ne deklarasaun ida nebe deskoinhece liderança Xanana nian. Compara kondisaun moris povu sira iha área rurais nebe maioria hetan ona naroman ne obra ida nebe barak dehan elefante branco. Se ohin loron Organizaun para a cooperação e desenvolvimento ekonomiku nia relatoriu hasai Timor-Leste hosi Estados frágeis, ne iha custu politiku no hetan hosi investimento sira nebe governu sira uluk halo atu mitiga konfliktus. Pakote Referendum nebe IV Governu halo hodi loke obras haleu Timor instrumentu de mitigasaun politika atu normaliza ita nia ambiente politika hodi lori fila hikas deslokadus afetadus tanbe krize politiku militar nebe ita hasoru iha tinan 2006 nia laran. Se ohin loron ita hamrik nudar nasaun ida ho soberania total, ne mos iha ukun ida CNRT nian. Tanba nee hanesan aliadu CNRT nian ami rekoinhece buat balun karik ladiak maibe mos ami la simu bainhira Governu sira kotuk gasta osan arbiru no gasta 14 biloes laiha folin. Regiao Administrativa Especial Oekusi laos mosu deit. Ne frutu da Governasaun CNRT nian ho Obras sira nebe Dr. Mari administra. Dr MA gere obras nebe V Governu inisia mak hanesan ponte Noefafan, Irigasaun Tono, estradas nebe hahu hosi fronteira mak obras nebe V Governu hahu no transfere ba RAEOA. Tanba nee CNRT ho ami sira nebe ba haleu Maun Xanana biar ami ladun hatene diak mais mos ami ladok hosi maun imi iha tempu difícil ami la ba foti deit oportunidade mais ami ba partilha responsabilidade atu hatutan misaun nebe Guerriheiros no heróis sira halo.

Exia Sr Presidente do Parlamento Nacional
Exia Sr. Primeiro Ministro e todo o elenco governamental
Distintas e distintos deputadas e deputados
Povo Rona Nain

Wainhira Bankada PD foti fali situasaun sira hanesan temi iha leten, ankada la hanoin hasai retratu hodi posting iha FB atu hetan komen hanesan cidadão sira dala ruma halo. Bankada PD la halo ho intensaun atu dun Partidu seluk sala no ami nia partidu mak los ka ami nia partidu sala no partidu nebe ukun mak los. Bankada PD foti situasaun hirak nee nudar retratu atu ita hare hikas ita ida idak nia an hodi komprende kuandu ita hotu koalia tenki defende interesse nacional. Karik, halo povu hetan moris diak iha vida social ekonomiku laos asuntu interesse nacional? Karik edukasaun ida diak ho qualidade ba ita nia oan no bei oan sira laos asuntu interesse nacional? Karik ema hotu hetan tratamento saúde diak hodi hetan moris naruk no moris tinan barak laos kestaun interesse nacional? Ka Tur nudar Presidente da Republika, Primeiro Ministro no Ministros, Dupadus mak objetivu hodi ita nafatin hases malu no hasé malu?

Excelencias,

Bankada PD laos mestri e sei la sai mestre hodi hanorin politika ba partidu seluk ka ba deputadu ruma. Bankada PD mos hatene katak partidos nebe ho kadeira barak iha lian makas no bele halo duni barulho bot no bot hodi defende povu nia interesse. Biar Bankada PD kiik ho kadeira lima (5) karik ami nia lian l ato hodi halo barulho ka estrondu maibe ami nia lian bele halo eko eh hodi fo lian seluk iha lian bot sira nian. Tanba nee ami iha obrigasaun, iha dever atu bolu atensaun ita hotu nian atu hamutk hadia ita nia povu nia moris, hametin ita nia ukun rasik na, no haforsa ita nia existencia nudar pais soberano.

OGE 2020 labele ona atu fo garantia hadia povu nia moris ho hadia estrada, Be mos, eletrisida, edukasaun, saúde. Maibe OGE 2020 sei bele atu tulun agricultor sira halo sira nia natar, hadia sira nia kafe, kuda ai horis foun nebe bele sai nudar variedade foun atu iha futuru mai aumenta ita nia atividade iha komersiu internacional (exporatasaun produtos) e mos atu hari indústria seluk par além da indústria petrokimika nebe mos importante tebes nudar indústria dinamizador ba desenvolvimento iha Timor-Leste.

Exias,

Tan mos OGE 2020 nia durasaun hela deit ona fulan rua resin, Ukun Nain hotu hahu hosi Presidente da Republika, mai Parlamentu Nacional, nakait ba Governu prezisa atu uza momentu ida nee hodi mos halo opsaun politika atu normaliza hikas situasaun politika nacional. Timor-Leste ida nebe nia ukun na mai hosi unidade nacional Timor oan nian labele rahun eh labele naksalak tan deit ba nkapasidade atu lahatene simu malu nian, tan deit interesse eletismu hodi haluhan kompromisu defender o povo maubere.

Orsamentu ida nee tenki sai mos instrumntu atu halo normalizasaun da politika nacional. Repoe normalidade no la basta hatur malu ba ukun. Ukun atu halo normalizasaun politika hodi viabiliza desenvolvimento nacional.

Exia Sr Presidente do Parlamento Nacioal

Exia Sr. Primeiro Ministro

Buat nebe Bankada PD koalia laos buat foun nebe foin ohin mak koalia. Hanoin sira nee mak Bankada sempre hato iha oportunidades hotu nebe iha no halao iha Parlamento eh uma Lisan bot povu Timor-Leste nian ida nee.

Atu taka hau empresta liafuan deputadu Antonio Benevides nian hosi Bankada PUDD bainhira hato iha intervensaun iha abertura 3ª sessaun legislativa nebe loke hosi Nai PR iha dia 15 de Setembro liu ba: Lalaok politika to ohin lora historia ida nebe hakerek ho Tinta foer iha pagina nakles. Deputado Benevides halo kritika ida nee atu fo hanoin politikus hotu hahu hosi Presidente da Republika, mai Parlamento Nacional no Governo. Ita labele halo ida nee tanba ita deve herois no martires sira: Sirak “hakerek história ho sira nia ran iha fatuk besi”. Tanba nee ita nia dever atu dignifica sira nia martírio ba rai ida nee hodi hases ita nia egoísmo no ita nia arrogância atu hare ba interesse nacional hodi halo diak ba povu nia moris diak. Lasama líder foin sae hanorin: “Ha unia dignidade la as liu dignidade nação nian”. Tanba nee mak iha PD mosu hakarak sira : Ba Timor Maubere oan pronto servi no hakarak Timor ba Timor oan hotu.*M_PD.